

Papru

TIMIUTÉUN

ATAKSHA papin aar akuptukma

Papru Timiutéun áatramiania nu

1 ¹Wi Pápruitjai. Yus wakerakui Jesukrístu akatramurí ajasuitjai. Ashí Jesukrístujai tsanínkiarun “Nekas iwiaaku átinian susattajai” tñiuiti Yus. Tuma asa nuna etserkat tusa akuptukuiti. ²Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentramainiak imiatkinchanum shiir pujustinian yainmakarti.

Krístunu takastiniaitjinia nu

³Tsawajsha káshisha Yúsan áujeakun ámin tuke enentáimtusan ti shiir Yúsan yúminíajajai. Winia weatur túrawarmia nútiksanak Yúsan enentáimtakun ti shiir awajeajai. ⁴Kanakmiaj nuí eantramiam nuna tuke enentáimtajme. Ataksha wararnaisatai tusan íitniun wakerajme. ⁵Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujaj atak kakaram takasta. ⁷Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. ⁸Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseream nujaj shuar yajauch túramainiakui surimiamtsuk

wáitsatin enentáimtumarta. ⁹Ii péñker túrichu árinin Yus in anenma asa uwentikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiayi. Yaunchu ju nunka atsaisha in tuke waitnentrampramaji. ¹⁰Turá yamá in Uwemtikkiartin Jesukrístu támatai nu anenmamu paant ajasuiti. Niisha jákatniun nupetak emesramiayi. Tura uwempratin chichamjai jáchatai iwiaakman paant awajturmajai.

¹¹Nuna etserkat tusa Yus anaitiukmiayi. Tura akattur Israer-shuarchanum akuptukmiayi. ¹²Túruta asamtai ti wáitiajai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wínian susamaj nuna ti péñker waitruktatui.

¹³Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujai anenkratniuitji. Tuke núnismek túrata. ¹⁴Yus ámin takasat tusa suramsamu shiir takasta. Tura Yusa Wakaní in pujurtamaj nuna kakarmarijjai túrata.

¹⁵Asia nunkanmayá shuar mash iniaitiusarmai. Nu nekaachmaashum. Nu shuarnumia Pijirusha Ermujenessha armái. ¹⁶Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantruchamai. Ii Uuntri Kristu ni shuarincha waitnentrarti. ¹⁷Rúmanam taasha natsantrutsuk eatak wáittsuk iniaitiúschamiayi. ¹⁸Ipisiu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

Kakaram ajasta

2 ¹Amesha, uchirú, Jesukrístujai tsaniñkiu asam nu kakarmajai kakaram ajasta. ²Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintiwarat tusam akupkarta.

³Ame ti péñker Jesukrístu suntari asam wáitsatin katsuntrata. ⁴Suntarka ni uuntri tana nunak umiktin asa chíkich takatan pachintiukchatniuiti. ⁵Núnisan nakurincha nakurustinia nujai métek nakurachkunka nekas péñkeran awakmakun súsatnia nuna achikchamniai. ⁶Ataksha núnisan shuar ajan takaana nu, ashí shuara nankaamas nuyan yúashtinkiait. ⁷Wats, ju menaintiu métek-taku chicham ániawai. Péñker enentáimtakmin ii Uuntri Kristu paant awajturmastatui.

⁸Jesukrístu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étsereaj nu. ⁹Nuna étsereakun sepunam jirujai jinwiamu pujakun wáitiajai. Túrasha Yus-Chicham jinchiachminiaiti. ¹⁰Ashí shuar ni shuari arti tusa Yus achikiarua nuna yáintajtsan ashí itiurchatan

katsunteajai. Nujaj Jesukristujaj tsanin_kiaru ásar uwemprar tuke shiir pujusartatui Yusjaj.

¹¹ Ju imiá nekasaiti:

Jesukristujaj jákaitkiurkia Níijiaisha tuke iwiaaku pujustatji.

¹² Wáitiakrishia Nijijaj akupkattaji.

Natsantakrinkia Niisha natsantramprattaji.

¹³ Umichuitkiurniisha Ninkia tuke uminiaiti. Warí, Yuska ni enentáimmiajain yapajniátsuk tuke umiktiniaiti.

Yusaj natsaaraqaj tusam ashi túrata

¹⁴ Shuar jintintiakum ju enentáimtíkrata. Ii Uuntrí Yus ímmianum chichamjaj yajauch tunaiyarain tusam chicharkarta. Nu tunaitin penké áantraiiti antsu ántuiniana nuna yajauch awajenawai. ¹⁵ Yus-Chicham tuke enentáimjaj péñker unuimiátram shiir jintintia warta. Túrakum Yus péñker írsat tusam péñker takarin atá. Túramka Yusaj natsaarchattame. ¹⁶ Jú nunkanmayanak ántar áujmatin ainia nujaj kanaktia. Shuar nuna áujmatainiak tunaanum nuna nankaamas wáiniawai. ¹⁷ Ni jintiniamusha sunkurjaj métek pampaawai. Iminíusha tura Piritiusha nu shuar ániawai. ¹⁸ Niisha nekas chichaman iniaisar tura ashí Yus-shuar nantaktincha nankaamasai tuániakuí chíkich chíkich shuar Yúsan naka enentáimtuiniatsui yamaikia. ¹⁹ Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

²⁰ Kufrinniu jeen kurijaj najanamusha kuitjaj najanamusha írunui. Nújainkia ti shiira nu takastin ániawai. Tura numijaj najanamusha nuwejaj najanamusha írunui. Antsu nújainkia nekasmancha ainia nu takastin ániawai. ²¹ Núniskete Yusa takatríjaj. Ashí tunaanumiá kanakir péñker wekasar shiira nu takasmin átatji. Kame ashí péñkera nu takasmin asakrin ii Uuntrí Jesukristu wakerak péñker takata nuí apujtamsamniaitji.

²² Natsá wakerutai iniaisam esetram péñker wekasata. Amesha ashí shuar shiir enentáijaj Yúsan áujena nujaj Yus nekas enentáimtakum aneniakum ti shiir pujustá. ²³ Enentáimtsuk chichainiak aya ántar tunaitinian chichainia nu pachisárap. Nusha aya némasmanainiawai. ²⁴ Ii uuntrí Jesukristu takarniuka chíkich shuarjaj nemasmanaikiashtiniaiti, antsu ashí shuarjaj péñker nawamnaikiatniuiti. Tura waitnentáimturar péñker jintintiatniuiti. ²⁵ Tura umircha shuarnasha Yus ni enentáin yapajtiakuí nekas chichaman shiir enentáimturarat tusa péñker enentáijaj jintintiatniuiti. ²⁶ Nujaj íwianch ni wakeramu túrawarat tusa achikmaitiatan uwemprartatui.

Amuukatin tsawant jeatemantai aents ti tunaan túrawartatui

3 ¹ Amuukatin tsawant jeakuí ti itiurchat átatui. ² Shuar aya ninkí enentáimtumasartatui. Kuftian ti wakeriartatui. Nankaamantu

enentáimtumartatui. Yúsnasha yajauch chicharsartatui. Aparíncha umirkachartatui. Yumínsatniuncha nékachu ártatui. Ashí Yúsnancha enentáimtuschartatui. ³Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasri ártatui. ⁴Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. ⁵Yusa kakarmari “ántrai” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip. ⁶Nu shuarsha shiir chichayatan anankawar jeá wáiniawai. Tura nuwá esetar enentáimchan nekas tunaarinnun anankainiawai. Nu nuwá ashí yajauch wakeramujai anannainiawai. ⁷Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. ⁸Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámprissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintfatniun penké tujintiainiawai. ⁹Túrasha nuna nankaamas kuakchartatui. Shuar ti paant ni netse túruiniamurin nekarawartatui. Núnisan nu jimiará iwishniujai túrunamiayi.

Amúak Papru Timiutéun akatramiania nu

¹⁰⁻¹¹Tura ámeke wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura anenkratkun shiir enentáijjai katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwemtikrurmiayi. ¹²Nekasaiti, shuar Jesukrístujai shiir túrataj tákunka ni nemasri áintiam ti wáitsatniuiti. ¹³Tura ashí anankartin ainia nusha kame ashí yajauch shuarsha nú yajauch túrukiar wétatui. Iwianchjai anankamu ásar chikichnasha anankiar weartatui.

¹⁴Antsu ámeke unuimiam nu imiá nekasaiti tu enentáimtakum tuke emetata. Jintintramawarmia nú shuarsha wáitrichua nu nékame. ¹⁵Úchichinmayan Yus-Chicham nékame. Yus-Chichamka uwempratniun jintintramamniaiti. Nusha “Jesukrístu nekas enentáimtakum uwemprattame” tawai. ¹⁶⁻¹⁷Ni Papirín áarat tusa Yus ni shuarin áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papijjai nekatatniuitji. Tura awajiakrincha Yus-Papí núnaka paant jintintramji. Nuyá naka wekasatniun jintintramji.

4 ¹Ii Uuntr̄i Jesukristu amuukatin tsawantaī Uunt Akupin ajas iwiaakuncha tura jákaruncha ashí pēnker túramuncha tura yajauch túramuncha nekaattawai. Tuma asantai Niisha tura Yus Apasha íimiainiamunam juna akateajme. ²Uwempratin chicham etserkata. Yúpichuchia nuisha tura itiurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. ³Ukunman̄ka pēnker chichaman nakitrar ii wakeraj núchik nekaatai tusar, shuar teremak pēnker pujuscharmnia nekapea áintsan, nan̄kaamas unuimiaru atai tusar, nán̄kamas unuikiartinian ti untsur̄i eakartatui. ⁴Nekas shiir chichaman iniaisar ikiuiniak ántar áujmatsamun enentáimtusartatui. ⁵Antsu ámeká tuke pēnker túratin wakerakum ashí itiurchat katsuntrata. Uwempratin chicham étserkum takatrum pēnker umikta.

⁶Ishichik ajasai winia iwiaakmar Yusaī surumaktin. Mantamnan nayimpiniam wétin jeatimiai. ⁷Shuar kakaram maanainia núnisnak tuke kakaram takasmajai. Tséken pēnker tsekea áintsanak yawetsuk takasmajai. Tura Yus-Chichaman nekas akasmatkun pēnker wáinkiaitjai. ⁸Tuma asantai tawasap nukajaī najanamu tsékena susamua áintsan wisha pēnker túramunam akinkiaitjai. Tura aya wíniak akirkashtatui. Antsu ashí ni tátinian shiir enentáijiaī nákania nunasha nekas pēnkera nuna akikiartatui.

Timiutéu túratin akatmamturma

⁹Wárik iiraitin enentáimturata. ¹⁰Témas aya jú nun̄kanmayanak wakerak ajapa ikiuruk Tisarúnikia péprunam weyi. Tura Kresentisha Karasea nun̄kanam weyi. Núnisan̄ Títiusha Tarmasia nun̄kanam weyi. ¹¹Túrawarmatai aya Rúkas wijjaī pujawai. Márkus eaka wáinkiam ame itiertitia. Jūi ti pen̄ker yainkiamniaiti. ¹²Tura Tíkikiunka Ipisiu péprunam akupkamjai. ¹³Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan̄ nuparam papísha tura nekaska pen̄ké papí takurtuktia.

¹⁴Arejántruka jirujaī takawa nu ti yajauch awajtusuiti. Túrutaitkiuisha ni túramujaī métek Yus akiktí. ¹⁵Nu amesha pēnker wáinkiatá. Ii étsereamun pen̄ké nakitiawai.

¹⁶Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak. ¹⁷Tura ii Uuntr̄i Jesukristu ni kakarmarin̄ surus yaintkiarmiayi. Nujaī uwempratin chichaman ashí nun̄kanam Israer-shuarcha antukarti tusan etserkamjai. Tura núnisan̄ akupniunmayasha ii Uuntr̄i uwemtikrurmiayi. ¹⁸Tura núnisan̄ ashí yajauchia nuyá uwemtikrurmatai Nii akupeana nūi nayaimpiniam jeattajai. Niñki tuke shiir awajnasti. Núnisan̄ atí.

Amikmaamiania nu

¹⁹Piriskancha ni áishri Akirancha amikmainiajai. Núnisnak Unisépuru shuarincha amikmainiajai. ²⁰Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. ²¹Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²²Ii Uuntri Jesukrístu ámijiai tsanin pujustí. Tura Yus ashí pénker waitmakarti.

Nuke atí.